



Alex Capus prelegia or da ses nov roman «Léon und Luise».

## Amur che superescha il temp

Alex Capus ha prelegì a Domat

■ (anr/fa) «Louise era ina matta sensaziunala», descriva Léon, la persuna principala dal pli nov roman dad Alex Capus, sia gronda amur. Quella ha superà tant l'Emprima sco era la Segunda guerra mundiala. Alex Capus è naschì 1961 sco figl d'ina Svizra e d'in Franzos en la Normandia. Dapi il 1994 ha scrit l'autur che abita cun sia famiglia ad Olten diesch cudeschs, istorgias curtas, romans e reportaschas istoricas. «Capus cumbina ils fatgs bain retschertgads cun ficziun», ha ditg venderdi saira *Esther Krättli* cun preschentar l'autur. El fetschia quai cun ina lingua directa, sincera e cun ina buna purziun umur ed autoironia, ha ella menziunà.

### Pliras istorgias d'amur

Quest'amur ha senti il public en la sala Tircal spert: Avant che preleger or da ses ultim roman «Léon e Luise» cumpari quest onn ha l'autur Capus quintà da sia mamma. Cun l'intenziun dad ir en En-

galterra ad emprendre englais s'aveva quella messa en viadi cun ses auto da Basilea vers Oxford. A Paris ha ella fatg fermativa per guardar la citad e per scriver ina cartolina a chasa. En quel café ch'ella aveva tschernì per far quai ha ella empris ad enconuscher in giuven. E cunquai ch'i pluveva a tschiel rut è ella restada anc in pèr dis a Paris ed è s'inamurada en el. «Uschia è ella seguida a mes bab en la Normandia», ha ditg Capus, «englais na sa ella anc adina betg.»

### Intgantà il public

L'autur ha quintà tge che l'ha dà l'impuls per scriver l'istorgia d'amur da Léon e da Luise da maniera fitg divertenta. El ha era dà ina pitschn'invista en sias metodas da lavurar. Alex Capus ha discurre libramain, cun gronda eloquenza. Ils preschents han pudì s'atschertar da ses enorm dun da quintar, da stgaffir purtrets e far reviver episodas da si'istorgia. L'autur ha survegnì in grond applaus.